

Ta manera tabata di spera pa cual e no ta ningun sorpresa

Ex Presidente di SPA, Guilfred Besaril candidato riba lista di MEP



MEP tabatin planea pa tin un conferencia di prensa ayera mainta, pero a cambi'e pa tene den oranan di atardi, unda hasta a ser propaga cu un bom lo rementa.

Den dicho conferencia yama na cede di MEP, lider mr. Evelyn Wever Croes a anuncia un otro candidato riba e lista geel pa eleccion na september awor.

Aki ta trata di Guilfred Besaril, kende tabata ex Presidente di Sindicato di Polis (SPA).

Mester bisa cu esaki no tabata ningun sorpresa, pasobra Guilfred Besaril ta MEP for di hopi tempo caba, maske cu tur biaha cu nos a confront'e cu esaki, el a bin ta nenga. Te ultimo aki, pa haci interesante el a duna di conoce cu e ta negociando e.o. cu Andin Bikker, pa subi lista di Democracia Real, pero tambe scondi scondi tabata papia cu Evelyn Wever Croes.

Kico a pasa, cu e no a sigui negocia cu Andin Bikker, ta bon pa Besaril bin splica. Hecho ta cu e ta ambiciona ma-

sha hopi mes pa bira un dia Minister di Husticia.

Y por ta, cu el a mira su oportunidad mas cu MEP cu PDR.

Pero sorpresa, sigur su participacion no ta. Y di biaha a drenta masha comentario, cu Guilfred Besaril a sa di prepara su mes, bira Presidente di SPA, y asina usa SPA como su trampolin pa drenta politica. Y awe esnan cu a señala esaki, ta hayando razon. Hopi di su coleganan polis ta pensa tambe esaki.

No ta keda nos nada otro di desea Guilfred Besaril tur clase di exito cu e reto nobo aki.